



朔巡讞書

嘗聞刑者成也一成而不變故君子
盡心焉宣雲鄙儻軍民錯居貧不聊
生閔不畏死而又馳馬試劔易與爲
非爰書所罹盜賊多有若亡命扞罔
或以睚眦毫髮恣意所傷卒而無悔
良足憫也迺吏鮮科目法靡準繩檢

讀書
宣
視委之戎幕拷訊任其武健文致周
內失其初情者逞逞而是烏能勝其
任而愉快乎凡余所慮或有縱舍不
過什一敢云無憾盡心焉爾矣
萬曆庚戌季春直指吳亮識

萬全都司斷事司

一起賊夷竊犯邊口官軍擒斬首級事梟示 啞

都氣

前件會審得啞都氣一時被擄雖出于不幸三
次入犯難託于投降業奉

欽依奚容展辨監決

一起出巡事斬罪 管承勳 張氏

前件會審得管承勳淫人之婦而毆其夫辱逼
自縊擬斬無辭張氏雖無威逼之狀乃方毆

而不抹旣毆而不守旣縊死而猶報奸夫唆
之逃也其心豈復知有夫耶正合和奸同坐
之文亦斬何惜監決

一起山林縲死人命事斬罪 李伯陽

前件會審得李伯陽夥盜劫殺歇案有據又攻
名潛竄狡詐無疑而 前院會審必云速拿
未獲三賊面質正法蓋其慎也固監候決

一起徒犯打死臺軍事斬罪 陳彥舉

前件會審得陳彥舉擬徒守哨歲月固可待也

而克心復逞故殺墩軍抑知姦拐孰與殺人
脫哨反干重辟愚亦甚矣斬何辭哉監決

一起刀傷人命事斬罪 魏洪

前件會審得魏洪以小忿而起殺心因子而中
其父殺雖誤而情實故論斬不寬監決

一起勒死人命事斬罪 白鳳麒

前件會審得白鳳麒宜淫逞忿勒死劉娼而乃
假作共縊之狀設爲同死之盟則其挈衣物
而逃抑何其負心耶展脫不情斬抵何說監

決

一起地方打死人命事絞罪 白天祿

前件會審得白天祿屠牛惡少空拳占姦遞剪索銀亦樂戶之常態而還以其剪擊殺石天真死于六日之內抵無可原監決

一起打死人命事絞罪 陳英

前件會審得陳英應當保長橫行里間以濬渠而索酒食猶可言也怪李時蓉之訐發而甘心痛毆斃于六日其何赦乎監決

一起出巡事絞罪 趙用斌

前件會審得趙用斌以失銀細事毆死三十年結髮之妻至暴至慳不仁不義彼用斌者何以生為監決

一起極惡兇霸懷讐打死人命事絞罪 李聰

前件會審得李聰以護子之私情修隣人之小忿釭片一擊中劉旻之左額死無日矣絞抵

奚辭監決

一起人命事絞罪 吳大仁

前件會審得吳大仁倚恃牢役乘醉行兇王成
邂逅一問輒遭毒棒至腦後四孔穢從口出
必無生理矣傷証甚確抵何枉乎監決

一起打死人命事絞罪 張勳

前件會審得張勳狂酗兇惡罵叔父毆孀母而
竟斃其孀前夫之子于兩棍三日菽倫圮族
極矣安逃抵乎監決

一起打死人命事絞罪 楊繼雲

前件會審得李承元醉酒抗差罪不至死而楊
繼雲拳毆石擊傷重四日而斃一抵不枉矣

監決

一起喫酒打死人命事絞罪 穆仲官

前件會審得穆仲官以趙萬民爭坐忿詈執柴
狠毆越宿而死檢証俱確擬抵不枉監決

一起打死人命事絞罪 楊仲庫

前件會審得蹊田奪牛黃大倉不無已甚而楊
仲庫率衆羣毆斂石迭施頂崩膊折斃于頃
刻暴橫甚矣絞抵實當其辜監決

一起辨理冤枉事絞罪 邢光裕

前件會審得邢光裕徵債質騾毒毆王庫死于七日藉令王應文倒地不起豈能兩償而邢景庫套買代罪是又殺一命也既克且狡不決何待

一起人命事絞罪 張州

前件會審得張州乘醉行克脚踢棍毆于氏斃于頃刻安得以病爲解佛主慈悲豈護惡道蓋州自負佛非佛負州也因之訶佛或不其

然固監候決

一起人命事絞罪 陳世魁

前件會審得陳世魁因武尚仁派鋤官田言激相毆心坎傷重死于當日卽本犯亦俛首無辭矣監決

一起騙畜苦死人命事絞罪 賈國虎

前件會審得賈國虎借驢盜賣已屬無賴而告官追償不從寬限遂甘心于郭貴國虎猛于虎矣雖有助毆而下手獨重見証甚真抵何

枉平監決

一起苦死二命事絞罪 屈尚志

前件會審得屈尚志護母欺姪倚尊凌卑克毆
孕婦武氏墮胎殞生何其慘乎二命一償猶
有遺憾監決

一起人命事絞罪 李柰

前件會審得李柰藉鄧世中爲居停主頂軍得
餉可謂有恩矣浪飲娼家一言規勸輒反噬
而中其母真豺類也絞不盡辜監決

一起打死人命事絞罪 李錦

前件會審得李錦妬奸懷憤恃酒逞兇狠毆楊
大臣死于當夜陳五其確証也絞當其辜矣
監決

一起人命事絞罪 何天賜

前件會審得張許之赴援劉伏祥同母弟也亦
屬至情原非多事而何天賜以同夥之故拒
之門外斃之當時可謂忘身以殉人矣抵復
何辭監決

一起誣執人命事絞罪 黃大禮

前件會審得黃大禮以賣奸下賤毆人至死而猶假服毒以求脫兇狡異常絞抵不枉監決

一起人命事絞罪 張守義

前件會審得張守義與常元止爭頭錢一文爾一死一抵兩命俱殞阿堵之爲禍烈哉監決

一起地方殺死人命事 張承惠

前件會審得張承惠游蕩不檢見詈于妻操刃行兇應手而斃雖自投井悔無及矣絞有餘

辜速決爲快

一起人命事絞罪 原輔周

前件會審得原輔周毆死韓廷伏情已真確而復毆死侯一鳳于獄梟獍性成二命一抵不

絞何待哉固監速決

一起地方人命事絞罪 吳尚仁

前件會審得吳尚仁因奸啓釁乘醉肆兇毆楊廷玉當夜身死絞抵何疑監決

一起打死人命事絞罪 任洪義

前件會審得高希伊索討油價理所宜然而任
洪義拋石殺人法所不宥絞無辭矣監決

一起克惡卽時打死人命事絞罪 田世官

前件會審得田晉于姪婦王氏生養死歛可謂
盡情矣而王祿以念經嚇告晉所爲發憤不
平也然謀毆立死律無不抵而田世官下手
傷重一絞難辭監決

一起打死人命事絞罪 劉天伏

前件會審得劉天伏以乞兒爭食毆死丐徒證
明情確日耗囚糧彼且以囚圍爲福堂而羈
獄尤愈于乞墦耶固監速決

一起地方人命事絞罪 張見

前件會審得張見逞醉恃強奪毆劉教八之柴
至于耳流血口吐沫三日而斃傷證俱確絞
抵何辭監決

一起打死人命事絞罪 趙體乾

前件會審得馮應舉負欠草銀而復碎帕登門
理固不直乃趙體乾石擊之拳毆之腳踢之

傷重當夜身死能追一抵乎監決

一起人命事絞罪 霍志儒

前件會審得霍志儒騙人之銀以宿娼又嗔人之索以肆毆拳石交加頃刻立斃而始稱服毒繼稱醉酒既入店房又移妓室狡謀種種欲蓋彌彰矣抵不為枉監決

一起人命不明事絞罪 張天爵

前件會審得張天爵開店誨淫索債肆毒毆楊祥至死而猶截帶勒項術益窮情益真矣監

決

一起劊死人命事絞罪 李時崑

前件會審得蕭氏溺愛其婿奪子之地而協力毆之李時崑之飲恨深矣劊刃廷杲甘以身殉所謂忘其親以及其身者乎監決

一起申飭審錄轉詳囚犯以杜弊端事絞罪 程

廷官

前件會審得程廷官與程全孫思順共毆陳尚寧登時殞命而顙門骨損坐于廷官則思順

爲證捏詞代告託于思順則廷官爲主雖欲藉口于程全之逃安能噤口于思順之辯乎故廷官縱有辭而尚寧終不可無抵也固監候決

一起出巡事絞罪 宋淮

前件會審得宋淮之毆馬續止于腎囊一傷死于七日初意曲揪棍傷或有疑實而據本犯口稱吳防守止打七棍則有傷亦未必能殺人也續之死非淮其誰抵乎監決

一起苦死人命事絞罪 張大良

前件會審得張大良倚牢詐人虐及婦女已屬可恨而推跌孕婦墮胎隕身二命一抵猶未盡辜毫無可疑速決難緩

一起兇徒同謀苦死人命事絞罪 劉雲

前件會審得劉雲以升合之米兇毆李思祿至再傷皆致命死僅越宿愚悍亾命絞抵何辭監決

一起兇虎打死人命事絞罪 賈天福

前件會審得賈天福越次派差已屬不公而又
毆楊國恩斃于三日諸竅流血傷證最確速
絞爲宐監決

一起打死人命事絞罪 王天伏

前件會審得王天伏與翟廷相素無嫌隙而以
不干已之忿爭甘心攘臂毆之至死豈非宿
冤耶法在必償抵無足惜監決

一起人命事絞罪 馬應舉

前件會審得馬應舉無藉狂徒買笑激忿追毆
仰鎮備極慘酷卽臨危猶施一踢克橫甚矣
招稱劉雲在傍助惡不行救解又云見打傷
重慌忙扶背而去竝未嘗有一毆一傷屬劉
雲也安得以助惡懸坐共毆而斃獄希圖代
償平事無可疑固監候決

一起卽時打死人命事絞罪 陳文貴

前件會審得陳文貴與冀乖同飲酒家適相值
耳趙要誤聽而起釁文貴抱忿而逞克畧無
小嫌遂罹大辟狂藥之爲害也如此固監聽

決

一起豪徒惡打人命事絞罪 王進文

前件會審得史繼禹調姦賠禮方免于禍乘醉發狂復訐其隱王進文毆之至死亦丈夫氣也然殺人無不抵其能免于絞乎固監候決

一起出巡事絞罪 李應年

前件會審得李應年欠高碩文租一斗五升耳而高碩悟乘醉辱罵執棍相尋似亦多事乃應年狠毆碩文斃于三日則法之所不貸也

監決

一起賊盜驟頭事絞罪 李黃

前件會審得李黃兩竊已刺三犯不悛而奪郭廷官之驟跡近于強罪浮于絞矣監決

一起出巡事絞罪 桑枝

前件會審得張婆子盜梁佳之草而張大祿庇之理自不直桑枝傍觀發憤下手重傷固難逃一抵矣監決

一起出巡事絞罪 劉天祥

前件會審得劉天祥毆徐尚儒重傷速斃檢証已真而賄差出獄盜屍棄河愈見情真矣此一而可疑是兇狡者皆得滅屍以漏網也監決一起出巡事絞罪 馮良

前件會審得馮良之毆宋天福微可疑者做仰塵畫褲腿耳審係忍疼強作聊為餬口至于服毒之說尤為無因不足信也况誣盜網綁行賄匿傷確有可據則馮良之兇而且狡甚矣抵無足惜監決

一起出巡事絞罪 姜廷槐

前件會審得韓美倚恃強隣指短姜廷槐房價以致廷槐恨極咬指中風殞命死無足惜而法則無不抵也監決

一起出巡事先問絞罪今改斬罪 郭承勳

前件會審得郭承勳倚勢謀姦李氏指無干之租囑禁其夫鞭逐其弟嚇逃其嫂晝馱夜逼以致傷胎就斃雖姦情未有的據而豪惡橫行致死二命一抵未足以雪冤改依因姦威

逼擬斬似協監候奏

請施行

一起打死人命事斬罪 郝甫臣

前件會審得郝甫臣爭分財禮石毆堂兄傷重
中風死于限內空服上刑監決

一起人命重情事絞罪 羅進秀

前件會審得羅進秀寄食于人乃嫌飯冷毆死
李名于旬日傷証已確而猶誣娼婦以洩忿
兇狡可恨絞抵無疑監決

一起勢官誣命事絞罪 段仲文

前件會審得段仲文暴橫腳夫隨處厮打始毆
曹應時繼毆李思相再毆李思剛死不越宿
兇人不殺其身不止絞何足恤監決

一起誣傷人命事絞罪 任尚智

前件會審得任尚智操刀逞鬪欲戳郭維臣而
誤中李守金斃于頃刻鬪殺誤殺絞均耳抵
有何辭監決

一起冤枉人命事絞罪 康梅

前件會審得康梅霸奸娼婦嗔其夫之怨詈克
毆立斃而又嚇其妻之假縊希脫重辟何狡
也檢無縊痕傷多致命論抵何疑監決

一起打死人命事絞罪 陳世福

前件會審得陳世福等惡少羣飲而令王海獨
償一之已甚至再而有不平之鳴亦情也
踢打傷重當夜身死抵復何疑監決

一起打死人命事絞罪 張夏

前件會審得張夏借衣無賴溫彥魁傍觀不平
而棍擊顙門十日而死樊守備之拶責宋天
寵之攙扶皆左券也牢役克橫絞抵無冤監
決

一起勢惡急時打死人命事絞罪 王自立

前件會審得王自立流棍聚賭以攫錢小忿狠
毆武應登十二日而死三檢已確一絞無疑
矣監決

一起苦死人命事絞罪 王梅

前件會審得王相負債交爭王梅助兄橫毆孫

天庫越宿就斃情真檢確矣監決

一起打死人命事絞罪 王伏典

前件會審得王伏典石毆彭斌頂心顙門因風致死雖在限外尚依本傷論抵而况斃于九日之內乎卽肉袒謝罪何嗟及矣監決

一起窩虎打死人命事絞罪 俞守亨

前件會審得俞守亨兇悍博徒旣得麥而復奪豆何無厭也旣毆其姪而復砍其叔何無賴也張美死不越宿抵奚可辭監決

一起猜命勦殺事絞罪 田策

前件會審得田策負債逞兇毆傷任國棟風從傷入死于限內三檢已確一抵難辭矣監決

一起苦死人命事絞罪 李如松

前件會審得王趕計日傭工食力餬口而李如松慳措兇狠畧無人心鉄肥何物頂心何處而可當其毆擊乎傷重七日而斃絞抵無辭矣監決

一起打死人命事絞罪 高相

前件會審得高相恃酒妬奸狠毆范登舉當時
殞命蓋擔折爲兩固知其傷之重而無疑其
死之速也下手最毒抵償不枉監決

一起打死人命事絞罪 李國甫

前件會審得李國甫以夢須米銀逼奪刀衣而
波及于白一寧毆之至死乃張倉一家三命
受累俱盡令人惻然絞有餘辜矣監決

一起打死人命事絞罪 蔣三

前件會審得蔣三摘瓜起釁投瓜殺人旣抱蔓
之無從卽荷校而奚枉監決

一起乞究人命事絞罪 王世伏

前件會審得王世伏倚差索財恃酒肆毆斃尹
恩于頃刻而乃欲諉罪于武國仲獨不思國
仲與恩何讐言而烹羊置酒添銀講和輒爾昧
心卸禍甚哉世伏之狡而狠也監決無疑

一起出巡事先問絞罪今改杖罪續奉決單 張

應國

前件會審得史尚義以久病之人爭出堡門跌

護書
一
一
踏身死及檢棍傷未至損骨而飢病已深因
跌致死馮倉吐証闔堡皆知不特史倉一攔
詞也况審無賄囑之贓止稱嚇說之語父求
免檢母稱病亾又豈舍骨肉之實情而徇仇
讐之虛嚇乎論抵終屬可矜改杖似不爲縱
監候

奏請定奪

一起鋤傷父母凌遲 燒朝兇

前件會審得燒朝兇原係夷種不識人倫弑逆
大變中華罕有候詳速磔又復何論

一起鐵斧砍死肆命事凌遲 任官

前件會審得燒朝兇之手刃其父猶云夷種任
官之連殺兄嫂及其幼子外母四命立斃豈
非中國人倫之異變耶窮兇極惡寸斬何疑
乃任澄擁厚貲而不恤堂弟至設席會親令
其掇盤管飯怨毒甚哉宐其及矣此亦可以
爲重利輕倫者之戒王氏旣休變賣可已

一起申飭審錄轉詳囚犯以杜弊端事斬罪 陳

效忠

前件會審得陳效忠抵觸親父飲恨服毒而死
奔告衛官其確案也通天之罪尚忍言哉詳
至速決

一起地方人命事斬罪 唐三

前件會審得唐三殺人而及其畜備極狠毒初
亦疑其不然會審之後又復詳審臉上一掌
谷二膚受之毆打叫呼小四子耳聞之驟肚
烹食和尚子口嘗之歷歷皆有証也三之罪
真浮于絞矣斬復何辭監決

一起圖姦害命事斬罪 任應麟

前件會審得任應麟姦人之婦誘人之財至于
因索財而助毆遂挾姦而無忌杜連斤之負
傷投井飲恨深矣淫婦縊未正法兇人斬有
餘辜固監詳決

一起殺死人命事斬罪 馮天臣

前件會審得馮天臣因言懷憤被盜生疑遂操
入室之戈欲殺同堂之伯而馮全脫厄周氏

逢殃亦可哀矣窮兇極惡擬斬何辭固監詳
決

一起境外地方人命事斬罪梟示 王天伏

前件會審得王天伏劫殺之贓據招有跡供吐
亦真而本犯嘵嘵有詞謂正賊達賴等六名
拏獲斃獄真贓寄庫則此招所不載也守口
道審究另報

批 王天伏審係妄辨仍照原擬監候會審詳決
收管繳

一起人命重情事斬罪 楊志畢

前件會審得楊志畢因姦謀殺郭朝雲雖云曠
野無証而十足布之買和乃其左券三尺法
之擬斬安得有後辭乎固監詳決

一起鳴天除害事斬罪 閆章

前件會審得閆章窩訪神奸戍遣漏伍假雕印
信搜獲覆刻情罪既真斬不枉矣固監詳決
一起申飭審錄轉詳囚犯以杜弊端事絞罪 范
九重

前件會審得范九重因妻貌陋愛弛義絕觀其
平日刀繩砒毒逼令自盡已不復有人心至
于醉後拳毆脚踢鍋片鐵錘石塊火棍連打
重傷備極慘毒又寧知有王法乎卽其自縊
自刎已爲情虧左驗不待管子之証而後
確也殘忍無良詳至速決

一起打死人命事絞罪 張天孫

前件會審得張天孫倚恃庄頭視張良爲枕上
肉誣盜酷拷備極克殘閱招令人髮指及觀
良垂命飲泣數語又令人酸鼻流涕也不殺
天孫必有霆擊而霜飛者獨恨屍兄喪心問
官眯目不得一批其頰而唾其面耳絞抵無
辭詳至速決

一起打死人命事絞罪 吉尚義

前件會審得曹世豹放利忘義以身殉財死固
其所自取而吉尚義救父殺人情雖可原律
無不抵監候詳決

一起打死人命事絞罪 吳宦

前件會審得吳宦因武進河取討缸卓跟隨嚷罵狠毆傷重七日而斃檢審已明抵償不枉矣監候詳決招內宦攜酒于進河家而黃院會審又云進河攜酒于宦家恐宦查明改正

一起乞究打死人命事絞罪 陳尚文

前件會審得陳尚文因二升之穀一言之忿遽率衆以登門致殺人而扞罔下手獨重抵不枉矣監候詳決

一起打死人命事絞罪 李金

前件會審得李金與韓仲旺結爲好友釁起爭奸鏟柄傷其額顱鐵剪截其左脇當時倒地三日殞生張友明之証確矣安得謂服毒誤中乎監候詳決

一起打死人命事絞罪 范聚登

前件會審得范聚登之毆死李州據招詞描寫跪央買首種種逼真若謂此囚無生理矣而其緊關情節又種種可疑問官終拘成案未

嘗就本招一細玩而深究也夫馮國固管窰把總也去窰上不遠聚登毆打口稱未見而向所稱証見者溫學科胡天福武進真今皆在逃可疑一也出首者牛文及誣唆証止稱許謝未獲真贓可疑二也李登林尋問伊姪未審死生而遽毀王順德之磁缸又毀李均之鐵鍋又毀溫學科之瓦盆故先撒潑尤見虛怯可疑三也至于血衣搜自李登林之家昭然在案馮國親口執証甚確而當時問官竟置之不理畧不追究今且曰李州之衣則何不在州之身而在登林之家耶卽此一節其爲登林謀死伊姪圖賴聚登恐百口難自解矣每見問官但據三檢之傷執爲一命之抵而初不審下手者爲誰祇憑庸弁強摘口詞定爲成案卽經屢駁總是依樣葫蘆則覆盆之寃何能見天日乎彼此出入生死霄壤豈容草草守口道詳審嚴究確招報奪

批 李州死無別因命須有抵一經駁審遽擬開

釋獨不念人命關天平李登林舖內血衣來
於何所問之不能答伊姪被毆聞於何人問
之不能答情已槩見不加刑訊彼登林肯唯
唯輸服乎且所云送衣楊應才今又安在而
不一審也范聚登之抵終不敢謂不寃該道
另委嚴明官覆究招報

一起打死人命事絞罪 陸華

前件會審得陸華石擊周東義皮破骨綻死于
十日檢審已確絞抵何辭監候詳決

一起急時打死人命事絞罪 李定

前件會審得李定毆王兆民止于一拳而一腳
之踢又係覆檢添出不類初情據稱馬跑驚
跌雖未可信而從圪臺跌下則磕傷所必有
也且兩人對面右拳當傷左耳右腳當傷左
乳而王兆民傷俱在右是亦可疑合行再審
巡口道詳報

一起地方人命事絞罪 王朝官

前件會審得王朝官椽毆李承爵頂顛骨綻當

夜身亾韓仁等見証最確抵有何說之辭監
候詳決

一起打死人命事絞罪 龐尚良

前件會審得龐尚良女與張天祿賣姦情踈反
面而網告張天受已屬牽証乃操石狠擊致
傷死于限內情真檢確抵無辭矣監候詳決
一起極冤枉命事先問絞罪今辨改不應杖罪

白進祿

前件會審得白進祿與杜賢杯酒交懽原無爭
隙及劉雨李伏毆打相鬩猶爲解紛歷審左
天伏王存義皆有的証而屍親杜堂亦稱虧
枉則進祿之不宐抵也明甚况律有同謀助
毆一死准償之條進祿卽共毆乎而劉雨之
自刎亦足以抵杜賢矣開釋宐宐監候

奏請定奪

一起打死人命事先問斬罪今恤刑改絞未示

王崇國

前件會審得王崇國與李氏稔姦情熟李伏邊

實縱之其毒毆至死止爲費益非因姦逼改
斬論絞宐矣監候詳決

一起出巡事斬罪 張祿

前件會審得張祿淫蒸主母氣死主父賺衣冠
之蒙垢貽門戶之遭殃諸囚已伏天誅一斬
宐正國法速詳處決

一起出巡事絞罪 李良

前件會審得李良以岳翁負銀而痛毆其妻殘
忍刻薄抵亦無恨但武氏耳聞毆聲而未嘗

目擊其負屍棄井之狀亦未聞裴氏哀叫子
女啼哭之聲何也檢屍鼻口有血則負屍者
衣必染有血跡當時曾一審驗否指有泥腹
有水殊類溺死若云有微息故有微水則氣
未絕而投之井又當以故殺論矣屢經駁審
未有確見安得使本犯之不嘵嘵耶恐此獄
非故殺卽自盡而毆死棄屍自謂其協者殊
未盡協也巡口道細究速報

批 李良毆妻棄屍原無的証裴氏指腹有泥水

自盡之情已明既經覆審依擬改杖的決還
加責三十板餘如照實收繳

一起出巡事絞罪 穆天祖

前件會審得穆天祖鬪毆雖起釁于王尚國而
棍打石擊但知洩忿亦不問其爲穆江矣殺
人者死抵自無辭何必借言誤傷復費詞說
耶監候詳決

一起出巡事絞罪 李朝臣

前件會審得李朝臣以步須飯錢追毆李迎春
斃于頃刻傷証已真人命之最確者監候詳
決

一起出巡事絞罪 董尚仁

前件會審得李時春之命斃于三克而董尚仁
之傷重於兩戊絞抵又何辭乎監候詳決

一起打死人命事絞罪 李義

前件會審得李義以借驢不與操石殺人六日
殞生一絞協律矣監候詳決

一起打死人命事絞罪 張萬寶

前件會審得張萬寶因醉而戲因怒而毆段雄
之命斃不旋踵愚悍之愍不畏死如此哉監
候詳決

一起打死人命事絞罪 申甫

前件會審得申甫欠郭應相工銀不與反加毆
焉死于當時抵復何說監候詳決

一起路塗白晝奪去真正強盜事絞罪 李茂才

前件會審得李茂才受重賄而縱強賊竊法甚
矣絞何枉乎監候詳決

一起地方人命事絞罪 余彥奉

前件會審得余彥奉以擲賭輸錢恡四文而殞
一命菜傭無賴絞何足惜監候詳決

一起出巡事絞罪 曹廷愚

前件會審得曹廷愚棍毆張倉傷証俱確雖死
于限外訊無別因監候

奏請詳決

一起打死人命事絞罪 王衍

前件會審得黃官之被毆雖未明言于母妻之

前而王衍之行克業已審得于胡二之証况以三檢之多傷合于兩次之用賄衍欲遁抵其將能乎監候詳決

一起誣屬抵死事絞罪 王世雷

前件會審得王世雷以一升荳毆李登春斃于當時先已輸認抵償而後復咬張賢撫辯豈所謂死而有悔者耶監候詳決

一起捕盜事斬梟 李玉斬罪 方扯巴

前件會審得張恩等強竊屢行贓証有據恩與李二李玉得財傷主梟斬允宐方扯巴李岐山強劫分贓擬斬不枉固監詳決

一起出首強賊乞拏分豁役命事斬梟 孫仲金

郭從壽

前件會審得孫仲金明火強劫持刀傷人贓証已確斬無辭矣惟勾結孟安之時原無郭從壽在內卽係仲金等亦未嘗招扳郭從壽也而孟安留心密訪續首添獲盜情最大從何處密訪而孟安亦何故留心若是及獲審又

稱牆外把風爲失主不認識之案及起賊又
憑郭尚儒一人搜取竝無見証安知賊之所
從來何故在煤堆搜出而尚儒口稱賊在櫃
中口詞又不一也郭從壽極口稱冤謂孟安
挾讐妄首事有可疑又稱家中原搜青布道
袍藍絹衫與原賊不對而以杜尚文魏景朝
之賊誣坐鍛鍊情亦有未盡者重辟不厭詳
慎懷隆道細心研審確報

一起強賊寅夜劫奪財物事斬梟 孫尚雲

前件會審得盜無真賊終難懸主孫尚雲之爲
盜不過據孫頂之招扳耳買主姓名屢訊不
吐而欲以張國登孫談之賊案尚雲之罪不
亦難乎據尚雲稱冤謂爲孫頂仇陷而孟縣
收監亦係孫頂姑夫許稟不再詳審終無以
杜其口而服其心也守口道確究另報

批
孫尚雲審無真賊或稱花費失主識認亦屬
模糊但其脫逃于保安而盤獲于孟縣誠有
可疑耳姑依擬監候會審收管繳

一起賊情事斬罪 王順賢

前件會審得王順賢強劫事犯懼罪脫逃屢竊馬騾拏獲証據論斬不在但夥盜已故前贓未獲合依秋後處決之例固監詳決

一起打死人命事斬罪 蕭天祐

前件會審得蕭天祐因趙全爭姦痛毆雖懷報復之心而乘醉逞兇亦屬邂逅之事况木鐺遞打又武登雲助之虐乎擬以鬪殺絞抵爲當故殺未協守口道再審詳擬報奪

一起辨冤起命事斬罪 范國禮

前件會審得范國禮與馮倉明火行劫皆失主趙氏劉寶哥子所面認者也贓旣搜獲主已驗明斬辟何辭卽妄扳徒累人耳固監詳決

一起逼姦幼女事斬罪 楊登亮

前件會審得楊登亮強姦幼女毆死公差兩罪俱無枉情一斬尚有餘憾固監詳決

一起拏獲強賊事斬罪 龐四 盧真 侯一科

前件會審得郭宇等聚衆強劫侯一科窩主分

一起地方人命事絞罪 殷周

前件會審得殷周無藉流棍酗酒逞兇毆死徐
二千頃刻傷証極確絞抵無辭監候詳決

一起打死人命事絞罪 邢明相

前件會審得邢明相因戲成憤逞醉發怒痛毆
董顯智死于卽時雖狂藥之爲祟亦惡業之
滅身也絞抵無冤監候詳決

一起黨棍蠹害事 左月

前件會審得左月嗜酒蔑法受賄縱囚旣犯明
條何辭重辟緩決速緝兇人其容漏網乎

一起地方人命事絞罪 徐文舉

前件會審得李朝用食瓜不償論理不直徐文
舉偶發公憤初無夙怨彼撞此踢非有必殺
之心倒地卽殞豈不幸而適相遭乎據審屍
妻段氏稱朝用年已六十素有疾病亦可矜
之一路也書赦青灾或在此輩巡口道再議
報奪

批 徐文舉踢死李朝用于當時中其腎囊實爲

要害姑以老病附於青灾擬杖似屬太輕合
依因事毆打例解發平虜衛充軍終身還斷
埋葬銀六兩招達部知餘如照實收管領狀
繳

一起殺死人命事絞罪 高安

前件會審得李尚科借錢懷忿持刀刺高安而
反爲安所刺雖尚科之自取乎而安之兇狠
亦甚矣屢勘明確擬絞允宐監候詳決

一起爭酒打死人命事絞罪并 金國良

前件會審得金國良與趙梅釀飲爭先扭擊致
命殞不旋踵其傷重矣杯酒忘身死何足惜
監候詳決

一起打死人命事絞罪 江志

前件會審得江志因張進智縱馬食穀奪棍毆
打死不移時雖助毆有江子登特拳腳耳棍
傷居多志手獨重安得以子代父乎志抵無
疑監候詳決

一起兇哨砍死本臺墩軍事絞罪 閆進才

前件會審得閔進才守哨克人意圖出柙而楊仲武遭其毒手死于頃刻乃進才黑夜就縛天網其不漏乎監候詳決

一起出巡事絞罪 盧東栢

前件會審得趙汝高身無夙疾檢有重傷應手殞命盧東栢難辭一抵矣覆勘已明監候詳

決

一起卽時打死人命事絞罪 王寧

前件會審得王寧之毆杜相也雖云護父業已殺人死不踰時生無還路矣監候詳決

一起謀殺人命事斬罪 楊國賢

前件會審得楊國賢以乞食小忿而狠打王二不已卽欲操刀而截之何其狠也故殺似協擬斬不枉監候詳決

一起伸受人命事絞罪 陳臈

前件會審得陳臈以借銀爭嚷毆死程菊于當時口沫便溺其傷重矣瘡豈能死人于頃刻哉絞抵不寬監候詳決

一起指命勦殺事絞罪 王尚志

前件會審得王尚志戀姦劉氏何彥臣乘醉逐
之情雖不甘乃刺傷三處斃于五日法則罔
赦矣監候詳決

一起刀傷人命事絞罪 張進朝

前件會審得張進朝以賊弟懷讐連毆張大信
于田間至截傷殞命罪浮于賊矣死于例限
之內監候

奏請詳決

一起人命事絞罪 孫鵬麟

前件會審得孫鵬麟欺毆水戶毀裂縫衣已屬
暴橫而李甫庇護嚷罵竟遭毒手骨綻目瞎
身無完膚死于俄頃慘亦甚矣絞復何追監
候詳決

一起打死人命事絞罪 胡維垣

前件會審得胡維垣搶王成錢三文而復斃其
一命重傷立死檢証情真絞抵其無辭矣監

候詳決

一起打死人命事絞罪 曹春

前件會審得陳堂責負于李應舉與曹春馮國文無預也一言見辱兩唾相加狠毆傷重死于頃刻春其能免于抵乎監候詳決

一起打死人命事絞罪 王仲滿

前件會審得王仲滿受值牧馬致有損傷已爲不直而嗔藍一元之講嚷棍毆石擊中其父賓死于限內絞無辭矣監候詳決

一起打死人命事絞罪 劉邦英

前件會審得劉邦英毆死族叔劉世科已經屢審確証多傷雖有磕撞終難藉口以自解也
監候

奏請詳決

一起急救人命事絞罪 張萬言

前件會審得張萬言毆死沈世芳惡狀傷痕初招有據雖失屍可疑而擬抵似無可疑矣但以死于限之外例之內合應

奏請耳固監詳決

萬全右衛

一起人命事絞罪 趙光先

前件會審得趙光先誤聽弟姪之言同紓報復之憤狠毆鍾杰七日而亾雖原謀有人而下手獨重抵何諉焉固監候決

一起申飭轉詳囚犯以杜弊端事絞罪 許還

前件會審得許還因賠盆小忿狠毆高爵垂斃而假縊以卸辜懼罪而遠逃以滅跡四年就逮一絞難辭矣監決

一起出巡事絞罪 劉廷訓

前件會審得劉廷訓負債不還恨梁應熙對娼索取糾叔毒毆死于限內元謀下手皆廷訓之爲也擬抵何辭監候

奏請詳決

一起賭博屈命事絞罪 陶國璉

前件會審得陶國璉好賭輸錢索衣質當嗔妻哭詈克毆立殂蓋無行義之尤者也先毆袁慶會疾漏抵今再難脫網矣監候詳決

保安州

一起打死人命事絞罪 唐廷科

前件會審得唐廷科忿爭酒肆遷怒酒傭磚擊劉申兩日而斃扶救保辜灼有証券一抵何辭監決

一起分豁屈苦人命事絞罪 高龍

前件會審得高龍盜礦而蹊人之田已爲不直嗔劉欒之阻說而用棍狠毆頭破血出死于六日血帽尚存趙鳳祥尤確証也擬抵不枉

監決

一起捉獲賊徒事絞罪 劉大泉

前件會審得劉大泉徒配兩逃竊盜三犯真贓
可據賊性不改事發雖在

赦前刺配原在

赦後卽援例

奏請恐難末減耳監候詳決

一起路塗打死人命事斬罪 閔二 馬國元

楊世科

前件會審得閔二恨柯堯勳之一言謀同馬國
元楊世科殺于路而剝其衣情極兇慘擬以
謀殺人因而得財律皆斬不爲枉矣監候詳

決

延慶州

一起苦死不明人命事斬罪 康舉

前件會審得康舉忿朱進孝醉討房價棍毆重傷付之虐焰其見打有隣孟何可問也共擡有子康應科可質也其遺屍有骨灰與未化數塊可驗也况以逃走而復稱燒死詞展轉而自獻其情以償價而合于再焚計詭譎而益露其拙慘毒烈于火斬抵其何辭監決

一起苦死人命事絞罪 孟朝恩

前件會審得孟朝恩與王大平阻葬其女持杖
狠擊獨不思女雖孟氏地則王塋庸詎能強
埋乎額顱傷重口耳血出死不踰宿擬抵無
冤監決

一起不明人命事絞罪 李宦

前件會審得李宦以巡城點鬧毆李小軍不爲
過但移怒田大賓重傷致命難逃一抵耳監
決

一起人命事絞罪 柳朝

前件會審得柳朝肩挑糊口細民微利而張奉
倚官白奪若固有之真禦人國門之大盜也
逞忿一擊殲此貪夫豈非人心一大快哉據
律擬抵無辭原情緩決爲是顧安得勇士如
朝寧喪其元而盡擊此輩也

一起拏獲盜賊事絞罪 李景厚

前件會審得李景厚竊盜已慣怙終不悛遣例
止宥其二絞辟難逃于五矣監決

一起出巡事絞罪 杜大金

前件會審得萬世仁之死全在腎囊一腳杜大金之抵只須踢腎一傷口出糞水內損最重此腳踢極得力之驗也次日卽斃審無別因賄買不從確有的據若不告其兄之說乃串招之詭詞正舞文之奸竇耳置之勿疑監候詳決

永寧縣

一起人命事絞罪

張季

前件會審得張季石擊高尚志腦後中其要害卽十五年之後覆檢枯骨猶有裂縫其傷重致命可知况其所謂跌磕原無指証盡屬石傷則一絞更無疑矣監決

讀書

宜

三



